

四庫全書

集部

欽定四庫全書

文恭集卷三十二

宋 胡宿 撰

書啟

賀鳳翔陳學士轉司勳并階邑

伏念畫節分符熾邦風而無狀赤油繫戟式侯度以偏
遙官箴雖幸于乞靈談緒慨賒于奉教恭審宸渙載渥
華資益清升主爵之名曹典序階之異數側聆殊擢增

躍最軀諒延辰之遵頤必介祉以洽勝伏惟某官標度
道上襟懷粹沖精義深繫教之徽懿行聳朝列之右自
副慎僚之簡克宣調俗之規一德鎮浮三輔居最朱輻
按部已安申伯之蕃宣盤石刻才竚掌安于之名命盛
節當暑薰風起辰爵刺奏儀造雌堂而茲邈和倪攝體
納神谷以為祈傾系所深短記奚悉

賀馬尚書再任亳州

恭審榮驅大旆再領巨藩以天臺八座之尊處東方千

騎之長坐棠猶在未忘召伯之賢騎竹相歡且見細侯
之返逖聆休命大慰輿情恭惟某官卿喬開祥肅溫成
德居然千載之後卓爾萬夫之望被累聖之知勲庸懋
建仰元侯之治風烈猶存十連蓋重于撫綏四牡更煩
于俞往優優之政夙結于民瞻善善之功久隆于帝念
佇聞召節式覲法宮庶幾哲父之安永列丞疑之輔某
雅承獎勗實愧空疎奏尺記以未遑辱鈞函之荐委背
芒斯集衮字增華拜隆賜以匪忘刻懦衷而無報感銜

之極拙述豈能

賀晏公轉刑部侍郎

伏審紫詔疏恩白雲登秩穆清有命華夏交懽伏惟某
官性貫誠明德符亮采識探天人之蹟氣鍾河嶽之靈
而自陟降帝臺毗維王室建周官之六典治具式張陳
說命之三篇忠規克壯功成暫退道闇彌章絳侯出就
于列藩令尹坦然無愠色嘉禾瑞鳳潁川之賦政有聞
方底綠綈太室之攷庸斯在總司寇外朝之治峻太師

維石之瞻枚卜功臣方寄調元之任疇咨舊德竚膺熙
載之求辱在甄銘倍深懼躍

賀永興安撫何侍郎

近審榮奉徽恩進膺顯命綽章惟允物論攸欽伏惟某
官性履醇優猷為敏濟早植秘圖之地屢分籌筆之權
進秩貳卿式峻中臺之望作藩全雍實資良帥之才暫
奉外游行當內輔豈期謙眷特枉榮函載玩情辭增銘
悰抱

賀張太傅轉官

伏審光被徽章寵升華序罷廣內藏書之職秩奉常典
禮之司凡辱睠存舉增慶慰伏以某官懿文綯道閎識
照鄰韞經國之遠圖分貳車之優任局無留事已彰循
吏之能爵以勸功實顯大君之任某恪居下邑坐遠清

藩

案此下有闕佚

賀燕諫議轉給事中并加勲

伏審被西清之異渥擢東掖之崇資傳聽之間忻詠如

一恭以某官藝文該洽器識融明才兼包于三長學通
貫于五絕為國著令作時楷模刑署盡心夙寃于中典
諫垣分職久矢于讜言帝睠已深具瞻尚鬱果奉紫宸
之命顯升青瑣之榮旦遇光華已膺于夕拜政資圖任
遽告于宸猷某抗塵滋深荷顧最舊側聽芝封之澤第
深柏悅之誠遐企風徽良增傾躍

賀王密學加勲爵

伏審祇奉宸恩榮加勲典伏惟慶慰恭以某官謨明迪

哲柔則居方懿績紀于廟彛茂德隆乎國棟踐揚膺仕
對越盛辰間升樞侍之嚴往往坤維之服中和樂職興
起于民聲寬大詔書布揚于上意亟承需澤聿被徽章
增體貌以迴殊隆等威而彌峻佇膺召節歸掌化鈞

賀王給事中

伏審寅奉霑綸撫臨大屏進圖書之華局輝方面之行
臺成命之有初愜心之增慰伏惟某官貞亨著節明允
休誠謨懿德以資贊襄日宣匪懈奮謀猷而加啟沃晝

接惟親屬雄聞之須賢由中宸而付命金鑾地峻暫辭
坡上之班策府望華式典禁中之秘簡良克重鎮雅攸
資寅亮天工方贊延于哲父典司國柄佇參列于阿衡
系頌之誠實萬常品

賀宋內翰

伏審被鳳韶之溫章踐鰲山之秘府寵聞休命抃極輿
情恭惟某官獄鎮吐符奎鉤產氣西京典策蔚惟廊廟
之高東魯文章迴到天人之際而自入居藥省專掌芝

函峻體貌之有加告謀猷而罔伏益厚中宸之顧爰登
內相之崇占地望于銀臺已鄰槐府副民瞻于具闕即
掌台司

賀朱祠部

伏審再迂使轡出按祥刑奉灝爾之帝書副恤哉之天
旨斷獄四百適邁于治平奏書三千矧隆于睠渥行膺
芝璽入典宮臺豈謂光謙首貽華削仰恩勤之致意但
銘悚之裝懷

賀和州朱給事中

伏審方底疏恩象河進秩伏惟慶慰恭以某官器懷優
裕識擅精明嘗陟降以法官特便蕃于宸眷久從郡寄
實爽朝僉天綽成章式頒于雅誥月曹馭貴爰正于名
卿方圖時棟之才佇踐良肱之位傾瞻茲切抽削匪殫

又

伏審被獎帝綸升榮卿寺伏惟慶慰恭以某官識研奧
蹟道貫中庸秉安節以惟亨蓄懿文而載郁內朝賦職

蚤居青瑣之闈巨屏宣風屢建赤油之戟休令之聲簡
帝惠和之化在民屬綈檢之攷庸由月曹而正秩九卿
之下括河海式峻榮階三公之坐論廟堂行參魁柄某
夙承輝昶克聽寵光託毫幅以未遑辱函封之荐及載
仰履謙之德居多克己之辭感篆匪忘惟兢增集

又

伏自濫榮中詔承乏外臺幕府樹風瞻亭臯而匪遠牢
盆守器託竿牘之未遑豈期象海之名卿猥降薄雲之

高義枉史公之馬走頌鄧守之泥封犀管摘詞驚華文
之溢幅玉音借譽覺虛美之薰心榮眄所臨感懷增極
屬南訛之長育諒泰宇之燕寧伏惟某官文獻挺才明
誠廣業體忠精而濟位秉器略以致君未賦政于兩樞
實結望于四國勉寬沖雅之量行宣毗輔之勲參觀尚
賒系凝交積

賀徐紫微

伏審榮被綈函寵躋綸閣伏惟慶慰恭以微樞置院倅

星掖之垂文綠邸頒書法天風之申令允資時哲克代
聖言伏惟某官斷兇雄鋒鳴岡瓌質步玉除而振藻冠
仙籍以升名拂霧旦朝早參飛于鴻黨望雲晝接常密
侍于龍姿蘊賢業以宏深注聖懷而優厚記言史局納
王法于婉微庀職省聯導國財于強富旋紆帝綍再易
使麾九賦漕輸不頓芒于恢刃兩宮簡在特申召于追
鋒延英既開宣室斯對芝封郁穆爰隆東觀之書藥署
陰岑乃踐曲臺之地典謨攸託名教是瞻雲漢成章布

堯言而伊始華蟲觀象碑山衮以在茲佇奮壯猷式參
魁柄庶幾輜賤永託甄揚

賀王寺丞

比者賢郎監丞狀元煥揚高藻卓冠羣英恢世德于華
宗昭義方于善教寺丞獨持高義遐損珍題仰降抑之
敦風但銘藏而匪石永言欣竦曷可舒陳

賀趙監丞

同判監丞蘊崇懿業發決榮科邁東戶之亨嘉叶南魚

之頌歎寵承天綍丕佐使麾徙池之勢方初儻物之來
曷測猥辱巽牀之禮先貽置袖之函感篆交懷敘宣匪
罄

代賀齊殿丞書

某伏審祇奉明綬驟躋通籍側聆新命竊忤牢襟恭以
某官品格淳修業術精奧父母一邑殆治狀之洽聞文
章當時矧物議之僉允佇繇盾省之局亟踐書林之游
未列慶函遽貽榮牘永言感躍曷究指云謹具狀陳賀

兼謝謹錄狀上

賀樞密侍郎

伏審丕膺寵綽光踐榮階丹扆用才仰謀猷之鼎盛白
雲進秩在名數以益隆德舉再光師瞻愈赫伏惟某官
識窮繫表道貫時先翊寶運以飛天灼清暉而照世典
樞之任方倚于俊臣進律之恩爰崇于貴級式厚當陽
之睠佇躋論道之司大副朝僉益恢帝載永言竦抃實
倍等倫

賀樞密左丞

恭審被帝檢之溫文進天臺之左轄樞衡是典式倚于
珍賢名數載加克光于凝績伏惟某官元精降氣大藪
生材植德本而端方體道沖而淵邃承光震邸有調護
之勲賦政數庭極贊襄之美屬九闈之第賞亞八座以
飛榮總乃懿綱毗于至治巖巖師尹方接于具瞻赫赫
公台即期于延拜永言慶慰實邁等倫

賀參政侍郎

伏審被綠綈之雅誥進碧落之貳卿端委星樞對司王
政法官注意延體貌以方高縣宇承風企龍光而竊忤
伏惟某官太和陶粹奕世生賢起韋平舊相之家輔勲
華至治之運歷更貴仕綽著茂勲謨九德以熙朝浚明
斯在參萬樞而濟位寅亮居多爰舉進律之文用煥秉
鈞之績亞秩宗而典禮式副疇庸正茂宰以調元諒應
匪夕某屬當官守阻覲鈞嚴徒慶慰以兼深在趨參而
弗獲

賀參政給事

伏審光被璽章進崇階級踐東臺之貴近貳宰府之謨
明天渥遂行民瞻胥協伏惟參政奮繇直道光輔本朝
亮節不回素仰蓋臣之操嘉謀罔伏益隆元后之知用
青宮翼贊之勲佐黃閣倚毗之政爰疏高爵式煥大猷
方委重于邦英佇正司于台席永言慶忭度越羣倫

賀司諫

竊以朝廷置官七爭為重賢俊居職萬事得言志策所

伸功利益遠伏惟某官克生王國雅意本朝方幅獻言
屢抗其疏宴閒召見未始不冠簡繇上心任以近職漢
世儒者給事于中唐制從官供奉于內今茲妙選允穆
羣談伏自拜恩未遑奉記出于謙眷惠以教函仰諗撫
情益增欣素衰索參累敘復甚稽感戢之私悚兢無已

賀陳州太尉相公

伏審肅奉帝俞升臨輔鎮伏惟慶慰恭以某官氣鍾英
粹道契亨嘉宣一德以同寅翔萬機而成化蔚彰社稷

之衛允播股肱之良屬肆類之均禧首膺圖任委陪京
之舊治彌表眷懷而某夙荷埏鎔倍增瞻頌欣沃之至
有異常均

賀留守相公

天元復始王歲開端寅杓回東陸之春蔌律贊少陽之
氣茲為獻節允納殊休伏惟某官性合誠明道全經緯
協千齡之顒望為一代之宗工坐運鈞衡秉甄陶于巖
廟出兼袞鉞方眷倚于留都佇聞舊德之圖即冠前疑

之列某馳情東閣方欲奉牋猥屈常尊首紆台翰永言
感慨莫克敷宣

又

天元上日王歲首正史策美于端辰卦氣榮于泰象伏
惟某官茂勲奕葉碩德佐時爰履三朝之亨彌膺百順
之祐出持管籥暫居都輦之留入輔本朝行陟樞台之
重趨承未獲系頌何深

賀知府太尉

人正著統王歲啟元受圖盛于漢京設樽傳于晉會伏
惟某官履三陽之吉膺百順之宜以漢世外家之親處
周邦良翰之任總司留印早分兩使之榮延拜齋壇行
帥十連之重方深善頌猥沐撫情特貽記室之函增佩
元侯之眷

賀知郡學士

伏審已承守邸之音將被解龜之命騰裝西路行奉紫
宸之朝降劄中臺佇峻天坡之位何乃一謙之益遠移

十部之賢銘悚交懷保綏是願

賀運使郎中

膺奉制函就遷吏部煩長淮之漕職按全楚之提封賦
政有初治書甫及曲盡親疎之意尤多款密之辭研玩
弗忘感藏斯至惟嚴凝之通臘諒寶練之臻和強濟之
才尚淹于遠用清切之任行陟于近班未獲晤言但增
遙悚

賀知府密學

伏審拜瞻宸綽進職天樞華煥遂行中外胥悅伏惟某
官該練治體敷洽朝章革履見于步趨溫室旌乎慎密
連分制閫之寄丕昭良翰之風河災既平允資于碩畫
帝心期簡方赫于茂功峻名器于有初參鈞衡而匪遠
勉精調護行副傾祈

賀知縣虞部

伏審光奉聖恩榮遷茂秩漢臺故事郎曹是應于星辰
周典舊文虞官實掌于川澤甄升有漸慶慰惟深伏惟

某官德尚簡溫性質通敏承孤毛忠教之厚資石建孝
德之餘膺渙綍于宸庭撫鳴弦于洛邑莅官行政固多
最迹之稱奏課攷功果被深辭之獎豈謂謙眷猥示書
牒在欣佩以匪忘于敘宣而莫既

賀新轉官海用啟

伏審光奉帝恩榮升朝籍伏惟慶慰某官清芳駕俗良
具幹時自撫翼于亨衢亟榮飛于顯仕居有懿績沃乃
上心果膺出綍之恩榮進中閨之秩未遑賀牘先辱飛

緘載形撓抑之謙交集悚銘之素


賀新轉京官海用啟

伏審芝檢發中方延于灑澤棘曹引秩序進于榮塗伏
惟某官夷雅飭躬中和布慶頒條貳局早彰耆驍之聲
第課疇勞亟奉丁寧之旨某側聞成命竊忤丹衷限疆
禁之所縈造賓趨而莫及

又

螭庭湛渥渙發于徽章棘寺分曹延登于美局某官躬

桓瑞品杞梓奇材協贊藩條早聞于治狀參評國令荐
啟于榮塗凡辱依游俱懷茂悅未遑晤挹莫量傾瞻



文恭集卷三十二

欽定四庫全書

集部

文恭集卷三十三至五

詳校官侍講 臣 王燕緒

檢討 臣 何思鈞覆勘

總校官原任中允 臣 王燕緒

校對官編修 臣 于鼎

謄錄監生 臣 章玉植

欽定四庫全書

文恭集卷三十三

書啟

謝李相公

近即真祠獲趨盛府半氈均席濫東閣之翹才百豆陳
儀辱西園之愛客撫薄軀而至陋玷英眇以迴深旋祇
事于殊庭復回轅于冗局永懷恩遇交切震惶適臨猷

宋 胡宿 撰

暑之辰邈阻高明之德伏望上膺毗倚勉順寢興宣哲
茂功方圖于碩老秉均當軸行冠于宗臣庶託甄鎔彌
深系望

又

比者肅齋真像遐款祠宮去相幕以匪遙辱鈞函之胥
洎朶雲媚彩乍閱于雕華攢箭在心頓增于危慄永懷
降挹曷敢弭忘

又

邇者虔託短封扣聞侍閣重煩記室遐纘鈞題形金石
之重言極雲天之高義發函披彩飾袞垂褒誠屈大臣
之尊敢拜嘉命之辱庚金在伏季火將中勉慰萬夫之
瞻載加方丈之食即期旦暮入冠宗公夙被甄陶日深
翹頌

又

比者相公奉寶書于方底冠羣后于東藩嘗因奏記之
文遠叩當關之吏有煩鈞重俯霽威嚴越從靜練之江

垂賜朶雲之牘永懷謙亮之德益增赧汗之誠

謝宋相公移鎮

近審改藩旋聞莅府河濱託乘徒羨于鳴笳境上馳郵
未遑于裁牘屈茲威重崇以謙饒洊墜教函載摛名筆
仰服褒華之飾彌裝感篆之懷臘過嘉平春回東陸初
賦仁平之政益臻福嚮之宜伏惟判府太尉相公先覺
照民宏謨緯國全德光于出處盛業著于規隨謝傅東
山方繫蒼生之望伊公莘野行聞舊老之圖入正中階

益升上袞三元行始百順來臻系頌之私實倍常品

轉官謝江寧相公

帝檢宣恩天臺進秩祇應崇渥伏積悖兢竊以六職肇
開百工是督東京故事始建于民曹典午舊官爰分于
起部掌繕營而至重在選擢以為優夫何蒙鄙之姿猥
玷光華之命此蓋相公大謨在德俯育羣材神化自私
曲被丹青之飾天光所濟遂塵渙渥之恩仰鎔造以知
歸感生成而有自

謝相公

祇守成命方遂赴官振棹三淮適臨于任所引纓數仞
未覩于風規豈謂眇私遽頒誨翰閱高雲之懿義踰褒
衮之增榮佩服輝光曷勝銘篆恭以相公鴻猷斧藻元
化羽儀植德本于羣倫播仁聲于巨屏載騰物論益簡
天衷南部宣恩疲瘵久蒙于綏撫中宸溫詔倚毗佇復
于凝嚴屬清和之在辰祈繁馭之多祐

謝馬尚書

近辭象闕已託甄揚屬以戒塗之間猥奉濡毫之賜俯
惟誠踊尤備德輝恭以尚書淵宇育神天倪粹美肇履
朱曦之候益臻鴻祐之祥瞻望軒墉卑情無任激切悽
悽之至

又

近者恭率賦輿恪趨軒陛旋之冗局常拜柔函敬仰元
臣式臨雄閫欽翹華館莫叩下風忽頒記室之書載馳
長鬣之士藻章巨麗慰誨隆優爰披有味之言更慚拜

命之辱凱風貫序畏日揚光在吉履之所安固福基而
彌厚稟精維嶽修輔本朝全德在躬懋勲在世出藩王
室式資元老之猷入贊帝圖佇總阿衡之任幅員咸仰
鑒察于茲訖在甄揚倍深傾禱

謝亳州馬尚書

近隨下瀨之船私出樂郊之地長波激箭悵鼓棹之難
停大幕泛蓮愧趨風之不獲豈圖行履遽達聰明過煩
撫問之私竊動震惶之色自旋敝局嘗拜尺題適瞻樞

斗之尊苦恨米鹽之侈猥蒙台睠曲齒外僚裁記室之
榮緘貺兵廚之珍醞朶雲盈簡華袞在言拜賜兼常渙
顏增悚況中臺之八座接上袞之三司實體貌之有殊
宜尊嚴之可屈此蓋某官府矜最質特越常倫不逮脩
程遂流下問永惟銜刻何以弭忘屬維夏之啟辰肇景
風之育物勉敦福履榮保天和方圖哲艾之姿行涉熒
煌之座願言跂頌實託陶甄

謝副樞侍郎

駙騎風馳遠降絲綸之命天恩雨霈益兼鍾釜之權循
牆莫遂于固辭臨谷但增于多懼竊念某才華不茂識
度非宏早逢開泰之期獲預明揚之列金閨著籍參諸
彥以無聞粉署聯班廁仙郎而有覲矧辱兩朝之采菲
繼叨三仕以飛芻舜帝明功宜舉黜幽之典湯王寬德
忽加懋賞之榮南連五嶺之區北接次畿之地咸均按
率允謂優隆愧忝冒以非宜省品題而有自此蓋伏蒙
某官包荒育德嘉善存誠因鴻樞密勿之餘奉黃屋詳

延之問致茲最品濫被渥恩敢不淬礪鉛刀驅馳駕駕
公忠盡瘁上酬雷雨之恩廉潔無瑕次答鈞衡之施

謝晏侍郎

朝綽驟頒使符改泣祗膺渥渥伏積凌兢竊以督貢篚
以修方禹州甚闊榷牢盆而商利漢制尤難將責實以
任才必簡良而付命豈茲懦品猥掌大權顧忝冒之所
來知獎提之有自此蓋某官卿雲借蔭鈎壁分輝榮輅
下之薄蹄曲令引重飾溝中之斷木不使棄才方竦佩

于恩私忽寵貽于書教枉郇公之雲朶休眄何深比陸氏之素裝寶持不佞永言感刻奚可弭忘

謝南京晏侍郎

乃者泛下瀨之歸艤涉陪京之大幕恭齋刺字肅款賓門瞻台座之熒煌久塵輝庇挹兵廚之醺醪曲被宴私辱英盼之兼常撫懦衷而增愧泊旋冗局闕拜空函豈圖樞宥之尊特尚謙撝之操猥頒荆紙躬灑郇雲煥華袞以致褒掩南金以申貺拜嘉增重撫已興慚伏惟留

守侍郎道貫中庸識精秘奧聖業資其潤色賢德仰乎
秉彝奮庸萬樞補王職于無闕接武三事納天工于太
和進中臺之貳卿總留都之管籥中外宣績聊出試于
价藩旦暮逢辰佇入冠于鈞席系頌所切餐寢不忘

謝安州范侍郎

阻奉台儀坐馳勞慊逖仰維翰之重允繫共治之良伏
蒙某官曲徇鳴謙特貺芳訊訂芬椒而有馥均永雋之
踰滋竊用中藏式敦至眷歲華晼晚邦政靖嘉願協頤

賢佇圖熙綽瞻懷所萃粗略匪宣

謝李密諫

謬塵天渥猥席使權戾止淮郊纔駐巾車之役瞻言江
府未遑免胄之趨方懷犀額之姿驟降繭封之問金坡
著位匪接于常僚瓊藻摛文敢安于榮貺字置袖而可
寶言飾衮以相輝心石用銘背芒增集仰葆真于莊室
諒協福于箕疇伏惟某官藥簡刻名奎鉤稟粹升華崑
閬蚤參仙蹕之遊訪道溫宣屢前帝席之對邈避列侯

之計聊屈价人之藩佇太寢之策勲副法宮之命相勉
調常膳式慰巖瞻矧蚤託于甄揚但日深于企頌

又

乃者某官輟坡上之近司奠江西之福壤車檐所過壯
弩矢于前驅里閭云歸耀錦衣于白日適臨藩翰大樹
風聲實雅俗之所瞻固外臺之胥仰不費庖刀之利諒
臻莊室之祥恭惟某官闕月淪精楚珩挺質早升華于
貴近特被睠于聖神坐進訐謨日深毗倚仙瀛之籍過

陟于鼇頭帝檢之文嘗批于鳳尾旋主甘泉之計大富
水衡之錢允隆師尹之瞻且議公台之拜懇辭柄用聯
奏囊封阮麾暫出于東平賈席久虛于宣室大猷協贊
式賴清光之臣召節延登即處前疑之輔獎題有素傾
頌兼深

謝梅學士

逋寇即誅樂郊罷警露章南闕彌東于宸襟封檢東臺
首膺于袞綉虔仰薄雲之義遠行流牘之音勤三復以

敦誠秉一謙而行已銘貽來貺悚刺懦衷伏惟某官大
雅充朝仙風拂世殿門引籍蚤竣于清班使斧宣威屢
分于寵寄謀猷宏博幹局精明所至洽于風聲惟良冠
乎郡國近者淮山聚盜頗達于薳聰漢劄命賢遂更于
麾守改轅夙駕解瑟更張大振肅于綱條重明申于購
賞蕩除小醜安帖齊民方底之書或褒于天語中繩之
府行陟于仙瀛銘戀所深述宣匪暇

又

謬被天光擢司國賦一垺從役方駐于征輪十舍傾風
匪遙于大幕瞻言鈴侍曠託郵音適懷渙墨之顏猥貺
珍榮之牘抒英詞而溢美篤瓌意以兼常仰荷撫存交
深銘愧肇戒長羸之序諒臻沖懿之風接宴辯以未諧
鬱襟棕而增極勉遵吉履行需殊恩翹詠之私倦談奚
悉

謝周大諫

近將命于殊疆方攝官于敝局屬牽疲役曠拜柔函豈

期上笏之英猥損圓封之貺極謙沖而致意假題品以
抒言仰推轂之見私覺集芒而增愧矧天坡之貴重處
侯閭之藩宣豈此具寮可當隆禮永言佩服奚敢弭忘
適臨歆暑之辰尚阻高明之德勉順粹和之氣行登宥
密之私傾頌所深述宣罔逮

謝胡少卿

言睽韻宇迅易年華引襟望風實賒于丹抱抽毫致訊
罕屬于飛郵恭惟疇厚之知遠貺珍華之翰河南憑几

仰意愛之彌親孟陵辱書實欣歡之無極逖瞻坐嶺弗
爽沖和恭惟某官偉望逸羣宏才御衆名臣刺部方總
于教條上帝簡心將延于體貌式登二府用慰輿情未
克承顏敢祈葆質

謝睦州朱給事中

自濫濡綸常馳柔幅近遘石城之使遠貽瓊蘊之書墨
妙相輝迴奪宜官之善牘珍可寶斗踰從事之賢仰蘊
藉以居多辱褒揚而太溢伏惟某官宣猷克壯秉德惟

醇蚤引籍于東臺乍淹賢于外服金甌之下久覆于香
名玉鉉之間即調于芳飪暄蒸未解系頌滋深勉覲葆
光竚茲延拜

謝朱給事中

近者恪修貢職祇覲宸闈式瞻幄坐之尊猗被綈函之
命星烏結秩濫造于冬曹金節均權復塵于使額自省
懦庸之質詎堪進擢之恩此蓋某官善育人材曲私風
鑒慕先民之推轂致即日之濫巾遐走伉兵俯傳真教

披英辭之藻爛仰瓌意之淵虛拜命增慚佩音無數永
言敢戴奚克序宣

謝子莊知郡

願言違摻坐積悃勞襍被以居慚禁門之尸職棲毫且
久缺郵舍之通書豈謂撓沖未繩曠慢遐記朋簪之舊
存貽訊牘之華執玩以還感藏無數自炎辰之順履諒
沖氣之保和伏惟某官風識清夷局量開敏久次道山
之籍夙陪文石之朝臨摯而顛未濟橐從之列不瑕有

害尚淹符守之居勉思塞馬之言行進階鸞之綴末由
款睇益冀珍調

謝福州袁待制

近者曲被恩章亞升卿序省叨踰而誠幸繫獎引之素
深尚稽書驛之儀先枉記曹之問過垂謙眷增萃感悰
伏惟某官名世傑才熙朝俊德早直秘文之所復聯拜
瑣之榮江城奧藩暫資于偃治斗樞近府行覩于參毗
尚遠披承益祈保輔

謝狄祠部

邈疎宴對寢結寤思居多簿領之迷罕託書郵之問猥
蒙疇念遐損珍題敦隆久之懿誠延華虛之美譽逖懷
意愛備積襟悰屬流火之協辰諒味腴之加勝樹風岷
益矧恢刃之有餘賜對溫宣佇追車之降召勉精葆衛
式大寵光

謝鄭都運

近覲清風獲攀舊契奉折樽之禮叨更僕之延遽屬即

黠
途未周素意忽奉垂訊彌紉隆私緬惟計局餘閒道腴
增集尤順和倪之理俟膺大用之恩其在瞻依曷勝銷

謝親家寺丞

自睽儀矩載涉暄涼方懷捉麈之譚忽辱偃波之翰衰
敝之族幸聯于華宗謙挹之辭遽形于緡旨載仰懇勤
之睠彌增感篆之懷克副瞻依攸宜葆育

謝知府密諫

言睽勝範渴奉仁遊絕憑操染之誠第積悃勞之吝比
者隣疆訖聘輶乘言還踐首境以方初邁伉兵之忽至
特貽函教繇布旨辭欽惠好之匪忘佩嘉音之無數伏
惟某官風致高飭識業精明雅意在于本朝美猷濟于
名閥萬兵督府聊施羊杜之才三事冢司行繼韋平之
拜永惟真禱實倍常情方屬緒寒益期冲晷

又

都圻孔邇書舍相望徒企見于風徽頗闕通于誠幅豈

謂未忘餘眷尚軫撫情比因行李之臨猥辱函封之貺
絢英辭而累牘秉高義而薄雲執翫忘劬佩藏增至久
苦冗煩之思稽憑柔劑之誠尚冀并容未攻逋慢大冬
積凜元陽甫升允納善祥別膺華渚系頌之至敷述罔
殫

轉官謝路轉運

比者帝扉修覲式綴于周班天詔升華猥塵于茂級擢
冬曹而結秩正禮闈以充員表著增隆寵輝至渥念僥

榮之所自識延譽之有來此蓋某官道高提衡志崇推轂齒牙不惜遂竊于靈名爵位相先俾叨于榮賁永言感篆匪克宣陳

大恭集卷三十三

欽定四庫全書

文恭集卷三十四

宋 胡宿 撰

書啟

知湖州謝兩府

越從凡品超補列藩地介江湖之饒俗兼魚稻之利溪
山勝秀土風善平前世稱州得者謂之佳郡本朝用吏
初亦選諸名臣未及孤生特為妄施竊念某稟才空劣

受性愚篤不通道數之方罕研世務之要起于徒步實
厥周行寡過未能常勤思于往行哀名不令亦勉勗于
前修幸階治之辰猥玷繙經之館位貌凡近既不足
以動人文采荒疎復無能而表世衛方多于君子魯且
號于真儒迫生業之屢殫加親年之在懼亟營外祿薦
叨上仁天子當陽規樹凱風之化相君輔世興憐烏烏
之情從欲推恩油然曲盡往俞數命惕若無從況乃邊
梗未夷戎車方駕汪童之齒宜執于干戈終軍之才不

習于金革未束置于高閣尚假守于黃堂忍愧宴安懷
私熙盛此蓋伏遇某官使人以器代天之工度用百材
胥協誠陳之矩曲成萬物各懷性分之方施及至愚謬
延良選惟佩乃賜以竭其頑有社有人不忘于力政在
官在庫但職于首公捨是以還未知所措

兩浙運使謝兩府

孤外守藩訖無報稱東南領使遠有光華度越餘州超
按本道寵過素望悖集丹衷竊念某品在下凡跡繇少

賤早緣寒素之日偶及仕進之門謬籍朝闈濫巾儒館
以鄒魯之鄙朴值唐虞之欽明當九官之吁都聞百工
之賡誦陪厠大夫之未出入周衛之中不有忠言少裨
上聽曾無治策以拾朝遺止玷書筵空塵計闥昨以私
門構閔親匿在攢因章請以歸躬幸詔除之賜補授中
吳之右郡給東省之左符密邇家園偃息解舍濱帶江
湖之利資承魚稻之饒視于他邦最為豐壤芻狗萬物
顯繫聖君之靈坯冶一陶陰知宰匠之力然而治無三

最事且百疎猥賜告寧之恩聽營舉祔之禮成區區之
小亮繫蕩蕩之至仁宿素所期嘗甘溝壑存亡為感何
咎丘山方還舊貫之栖且謹寬條之布庶伸久效庸追
羣譏不圖睿恩就升使領降尺一之詔檢易方寸之印
章服冕巡邦懼忝朝廷之寄過家上冢併成邑里之榮
所封之墳土未乾告第之泥書尚渥有懷春露之感得
慰寒泉之思加以前後十年周旋三郡皆叨善地並在
南州聯蹟二吳均有湖山之勝分行八使復居風土之

佳于已雖豐在民未泰大則餘杭一郡江役繁興次則
浙西數州人饑流冗糟糠不厭杼軸其空官司之犴獄
實繁部內之賦輿尤重早衰多病至陋極頑旌陟之恩
雖蒙于曲造負乘之質終懼于疾顛此蓋伏過某官平
秩天工敷施神化百材皆度俾安輪桶之宜庶尹允諧
克贊蕭韶之化致茲擢序敢忘銘願竭其愚少供乃
職過此以往未知其他

知制誥謝兩府

名器之公假人攸慎車服之賜章德為先施及腐生恩
踰本量內循空素交積悖兢竊以內史官儀號稱華重
西台資地進陟遽嚴演如綸之言式是羣下敷渙汗之
令形于幅員在宣賦之才難信選掄之任重安于之善
為命令隨用宰人射父之能作訓辭見誇敵國宜敷求
于髦彥用典作于詔文必也冒居奚逃聳誚如某文非
根道學不名家以野生一介之微玷士鄉三物之學會
皇初之紹宅濫宵雅之始官隨牒肆勤脫巾待罪治朝

博納務牧士幹之良下國召還猥玷材林之選預游雋
躡竊覘秘圖浩如觀海之莫涯惕若學山之遽止徒惜
迷于疑闕奚訂正于謬譌日費大官之餐歲重高門之
地自惟空劣無裨補于本朝願試劇煩因馳驅于外服
去文史切劘之益困簿書聽斷之勞契闊十霜竭來三
郡入預計官之聯屬出膺漕節之治煩輿賦是經顧才
資之素短吏文所責去學術而已疎有原魯將落之譏
乏武仲不休之思矧雋髦之輩出願駑蹇之早襄比來

試郡之行姑避當塗之勝方受言而刺郡忽辱召以還
台爰當入謁之辰俄被已行之命擢居記史參備禁聯
應文象于極東司言動于君側延英墜典曾未暇于建
明史觀移文猶弗遑于序次曾承使乏出講鄰驩幸謹
彝儀獲通常聘迨南轅之復命辱公府之試言忭迷制
目之淵僅就詔篇之次荒疎已甚擯黜是虞乃蒙含垢
之收進辱代言之任仍賁身章之飾併增神觀之驚況
書詔之煩當五曹之重而宿官之業有四禁之難貌是

瑣材疲于文俗心源久翳病幹弗支將何以宣究典彝
發揮謨訓尋權輿之所自知封殖之匪他此蓋伏遇某
官寬假用人謨明致主物有未獲則曰時予之辜善或
可稱斯惟我后之德翊魁杓而上運持坯冶而曲成乃
因密勿之餘愛奉詳延之問致茲叢品猥玷清官雖成
命之在茲愧用才之不值敢不恪修乃職祗謹攸箴考
父鼎銘用服益恭之訓虞人皮弁更堅所守之方某竊
抱危疴久居寬告雖偷存于殘息終稽奉于謝牋怠慢

之尤心願靡措成拔之惠肝膈弗忘卑情不任依歸之
至

知制誥謝外任

叨奉制函謬躋詞掖預裁方底之詔復從屬車之塵祇
荷寵甄交增榮悸某才資疎劣器質方愚感會昌辰階
緣薄技與游大國之俊領校外史之書佔簡畢之謬譌
莫能訂正守瓶簞之隘局無所建明姑避時髦之鋒斯
存拙者之效比來補外寢欲退藏久服吏文之資殆將

學殖之落竭來都輦更踐江湖十稔于茲百憂可既出于誤聽旋被召還參二史之記言預一介之修好徂裝甫褫試札就頒端陞西省之聯入備右樞之屬典司名命主作文辭宜先膚敏之求猥厚瑣涼之進省循甚熟慰藉有由此蓋某官扶厚時風獎成士類見私品目得遂恩章仍敦沖挹之風首枉褒華之牘言多溢美意切相先第增簸粃之慚莫罄汗筠之述

謝知郡考功

言睽德範阻奉優游相望荆粵之陬坐積參辰之歎山
川云遠歲月徂長曩置郵筒嘗紆函教屬冗煩之嬰思
惕操染之愆儀尚恃眷私未攻瑕短自商風之協候諒
妙氣之棲襟伏惟某官風識夷通器懷閎敏克繼名門
之韻聿升禮闈之華剖符臨藩早布宣于德教乘輶握
節復糾正于天刑薦著平反之風即奉寵休之命佇祈
襄渥入躋禁嚴邇德企深馳誠凝竚望風懷想尚阻拜
于光儀飛驛傳郵辱猥頒于華檢仰銜惠好居極銘藏

謝知郡都官

言阻溫儀坐更華序屬伉兵之至止辱榮牘之見貽惟
顥氣之甫回諒沖腴之彌勝西陵地密今者事叢諒幹
裕之煩神冀保頤之綏福

又

風期云邈星序北遷羣因書驛之臨常損教函之問旨
辭有溢謙眷彌沖以衰繭之病姿玷深嚴之禁直居多
燥吻曠致柔誠自素籥之戒涼固沖襟之集祉伏惟某

官器懷明劬才局周通早聯畫省之曹尚滯朱轡之守
能名最目已推冠于州藩優詔陟文佇入翔于臺省未
諧披晤但切頌瞻方遡蕭辰冀綏顥氣

謝知郡郎中

言違德矩企挹談叢屢星舍之云移曾書郵之莫寓豈
圖謙眷迴篤情期流款密之教函損褒華之文致久緣
袁幹竊冒禁聯徒佩服于嘉音曠裁修于謝幅尚期寬
裕未即訶嫌緬惟班政之餘保厥頤神之妙矧才猷之

茂著加治績于洽聞佇膺溫密之章進踐高華之任未
諧披晤但積頌瞻

謝知郡少卿

暎異風期淹移歲序莫遂晤言之適但馳勤望之勞猥
辱撫情見尋雅好遐損八行之翰增銘三復之言承舍
味于真腴彌協宣于妙氣未涯良覲尚冀精調系詠之
私敷述奚既

謝知郡學士

閒宴違談浚明企德坐易暄涼之序絕馳問訊之音夙
睽匪移函題荐及雅情彌腆榮藻益芬執玩惟勤感藏
兼積具承訟筭日簡治目歲凝文史自強神明逾粹道
山諸彥久企俊游策府羣書適資訂正即奉更書之入
別膺渙綽之遷系頌所深願言曷已

謝知郡中舍

睽奉溫標遷流華序方企浚明之德忽行款密之函飾
衮致褒折瑤流問服撫情而斯在慰衷抱以奚忘自順

履于時寒惟肆勤于政實無虧道養允協福綏矧惠化
之凝成佇寵恩之舉集未諧宴晤徒切願言益冀保頤
用寬馳系

謝知郡秘監

涓休日策受事堂皇因毫驛以寄通辱書牘之流貺仍
加味腴之勝彌臻綏福之宜伏惟某官履德清純栖神
簡素含金球之質性蘊韶夏之聲文進秩大蓬峻官儀
而伊始宣風列郡賦臺札以方初佇聞政最之褒將大

老成之用傾素增積造次罔殫

謝知府學士

祗局匪遑吮毫寢闕猥承謙節曲枉珍題越百舍之脩
塗託九文之仙跡獎憐加厚銜刻匪忘屬星火之方中
諒風襟之益快伏惟某官溫文具體雅尚邁倫久更畫
省之曹特厚遽疏之睠約史三長之筆哲聖翕歸宣風
萬里之沙治聲藹異行紆褒檢即峻貴塗勉務葆光副
茲懷戀

謝知府大夫

自睽溫範比辱榮函屬寓直于北門居常襍被思寄聲
于南國幾歎栖毫惟寬裕之見存幸疵瑕之未露瞻言
靜治彌宅至和外屏宣風暫治別車之任中臺參務佇
還起草之司益奉褒華庸躋要劇莫由挹晤但切頌瞻
謝運使郎中

叨奉宸恩進兼秘職以空疎之才品冒蕃疊之寵靈方
切愧魂猥承謙眷枉褒華之訊牘敦茂悅之襟情載欽

獎借之私彌切感藏之志迫于衰拙局在禁嚴居多寓
直之勞闕致報章之間厚意未答愧汗無從敢冀并容
莫殫數叙

謝提刑郎中

積稔暎風繫時懷德羣承挂冕之老特枉行書之郵高
義服之無窮厚意久而不答每惟逋慢第切兢慙緬思
繕性之方舉協治神之理想啟期之三樂無廢援琴願
衛武之百年益宜加飯永言馳系莫克敷宣

謝兩制

近者被詔叨榮亞卿外秩首辱謙沖之誨過形褒借之
辭展誦忘劬寘臧增耀伏惟某官韞才閎邁履德端方
踐荷橐之近班結藻旒之隆睠竚符士論入奉朝咨尚
阻款瞻徒深馳詠

謝成都鈐轄

風猷言阻歲序載華早愆裁削之儀尤積瞻馳之素鄉
承謙眷屢枉榮函比伸款洽之辭益諗周勤之志感藏

無替叙答有乖自順履于寒凝諒舉臻于休祉末由披
會尚冀節宣傾系之懷造次奚既

謝解替

被詔還都辦裝有日言念當衢之第將諧免胄之趨仰
寶練于機神沓祥臻于吉祉依仁匪遠結吝猶多勉奉
本朝動遵福履

謝轉輸

近頒明恩適諧莅任引領遐增于素悃順風猥奉于圓

封佩翫攸深欣慰彌集恭惟某官清猷輝鑠雅度淵冲
流馬之功洽聞于康濟蓼蕭之渥方佇于敷求隆祐用
臻虔祈無已

又

比者祇護睟容恭詣珍館挹瓊姿而匪遠浣牢想以居
多仰沐懿憐俯頒華削窺英辭之溢幅辱腆貺之兼常
銘悅交懷序言寧悉

謝諸鎮大僚海用啟

謬奉帝綸擢居使繡單車從役適憩于樂郊大幕瞻風
迴搖于楚旆未奉赫䟽之紙猥頒方絮之函灑五色之
仙毫時紆妙蹟秉一謙之懿德曲貺華褱荷輝眇之兼
常激懦庸而增感瞻言吉履式保太和伏惟某官秀範
冠時壯猷迪哲身兼數器挺國棟之偉材牘奏千篇包
王臣之大略禁闥之聲名籍甚外朝之表著特高繇上
帝之簡心資良臣之刺部行膺迅召式迓霑恩奉三接
之清光參萬機之大政雅承慰藉深頌瞻翹勉保興居

用宣靈寵

謝獲羣賊獎諭海用啟

小寇逋誅偶嘯聚于山谷大君有命爰會合于甲兵未
張一目之羅已覆綠林之黨如某粗修封管准奉詔條
空竭愚駑詎施方略洎投恢網益驚威靈夫何蕞爾之
姿忽被發中之命此蓋太保道存激勸言炳丹青露章
深達于穆清褒詔下敷于幽仄永言蔭庇惟極肺肝敢
不益勵寸心勤修懦節期于盡瘁上答所知

謝都督諸牧

伏以歌溥在辰企韻堂而不接鞅煩嬰思奉心畫以尤
疎某仰承謙挹之風繼損珍榮之牘丁寧抒意超十部
而並賢婉約成章灑五雲而有爛永懷恩紀併集襟悰
某官隆棟偉才宰朝茂器貳宮協化方延擢于正人兩
府須賢佇對持于魁柄願言系頌庶越等倫

謝卿監

茲者叨被詔函參聯卿省冒榮過厚揣已知慚敢期沖

挹之私先枉褒存之誨珍藏無數裁叙罔殫

謝人賀

比者叨塵天綽擢正郎曹伏蒙某人命記室以裁書走
伉兵而賜教鈞銜荐委慈誨下臨郇國朶雲灑筆精而
布體孟公榮牘煥言袞以成章捧戴有初凌兢失次沉
中台舊相貴絕于等倫而外計庶官禮無于匹敵仰荷
謙鳴之德但增夕惕之懷感篆所深序宣罔逮

謝人賀冬書

某再拜違奉以來可涯馳系鄉以牽鞅曠致誠悃比因行李數蒙教函稽于修答期在見寬長至今辰允納新福猥承寄示華緘感悚之懷無以云喻未由瞻覲益冀珍厚

致仕謝兩府

抱疾乞身甘守垂綸之瀨蒙休起廢復彈掛壁之冠洪造何私蒼顏有覲伏念某智迷寡達途遠多窮發策收科倚青陽而款轡辭榮就養懼華髮而循陔既銜弗洎

之悲仍困益侵之疹固當掃迹非敢為高松菊陶軒悄
無車馬簞瓢顏巷尚有琴書微倚樓看鏡之懷習尋壑
經丘之陋敢圖淪昧猶辱矜憐此蓋伏遇某官量合四
溟事兼九德闢振淹之公道崇礪俗之宏規拯拔湮沈
與繼千帆之後吹噓朽蠹俾同萬木之春而某瓠落奚
堪液櫛無用自初聳激猶弗如人向晚衰遲豈能就列
遠隨煙霧固非巢父之掉頭近處雲林願效堯民之鼓
腹有恩弗報懷德空慙

夫人謝賀封啟

某啟久違婉範日企芳猷空盈思遠之懷莫致問安之
禮緬惟春首聿此陽中無虧沖養之方益協懿和之美
今者幸會近忝渥恩得疏南郡之封仍進小君之號適
塵溫綈欲奉謝牋猥沐仁慈特賜函翰形褒華而溢幅
積感篆以在襟虛涼未獲于瞻依柔德更祈于保育

文恭集卷三十四

欽定四庫全書

文恭集卷三十五

宋 胡宿 撰

記

真州水閘記

夫權以濟事智在利人鄧訓改石臼之河

案石臼原本誤作石舊今

改攷鄧訓傳因理漕汜石臼河大功難立秦罷其役此言改石臼之河與范史不合

前史謂有陰

德謝傅築新城之埭後人比之甘棠猗忠利之在時邈

今昔而同貫江漢紀于南國設地險而稱雄舟楫濟乎
巨川前民用而為急若乃疏巖險之道貫利涉之津息
肩乎風波之民盡力乎溝洫之義則建安水閘之制其
利溥哉國家神基萬年天宇一統海隅日出具為帝臣
域中地大莫非王土文軫所薄賦輿攸共自江之南寶
藏是出有禹書金璆之貢兼漢官鹽鐵之利齒角羽毛
之所產資糧扉屨之所入固已府無虛用而國有餘財
維迎鑾之輿區乃瀕江之劇郡寶勢橫野壓楚地之五

千大浸稽天吞雲夢之八九南踰五嶺遠浮三湘西自
巴峽之津東泊甌閩之域經塗咸出列壤為雄據會要
而觀來大聚四方之俗操奇貨而遊市號為萬商之淵
淳化中始建外臺竝置大使領山海經畫之重督星火
期會之嚴九賦斂財日以商乎功利萬艘銜尾歲乃實
于京師先是水漕之所經頗厭牛埭之弗便江形習下
河勢踞高斗絕一方壁立萬仞每歲木葉秋脫天根夕
見七澤收潦當涸水之有初萬里連檣自上流而竝至

將乘高堰之險必俟靈潮之來淺涸貽憂引挽甚苦守卒達旦而不寐嚴鼓終夜而有聲人相告勞官不暇給乾興中侍禁陶侯鑑寅奉辟命掌臨岸局槃結必剖精幹有餘將剗革于舊方特起發于新意按歷長河之曲行營大江之濬經始二閘之謀關白一臺之長時制置發運使工部方公仲荀文思使張公綸咸以碩望注于上心秉牙籌而籠貨財握金節而宣命令樂聞經畫肇敏成功爰薙葺于章程旋條析于經費移屬本部調給

治具時太守都官曾公乾度前倅職方王公汝能咸秉
心勤瘁協志贊襄諸賢好謀而成衆材不戒而備扼其
別浦建為外閘礮美石以甃其下築彊堤以禦其衝橫
木周施雙柱特起深如睡驪之窟壯若登龍之津引方
艦而往來隨平潮而上下巨防既閉盤渦內盈珠岸浸
而不枯犀舟引而無滯用力寢少見功益多即其北偏
別為內閘鑿河開輿制水立防瞰下澤而迴深截澄流
而中斷月魄所向潮勢隨大上連漕渠平若置梁湍無

以悍其激地不能露其險木門呀開羽楫飛渡不由舊
埭便達中河憧憧斯來沾沾相喜商旅息滯淫之歎公
私無怵迫之勞歲省之費甚多邦儲之運益辦自天聖
紀號三年之冬庀徒皆作越明年孟夏僦工大畢材用
所給取于城守之餘力役所資輟于篙工之暇坯土不
奪于穡地秋毫咸出于縣官未幾制置二公秉命圭覲
嶢闕表其功狀刻寫規模由東塗而進觀自中宸而簡
在復降溫詔獎勸勤略且有天旨申諭郡將飭其必緝

貽于無窮噫自建隆之元王塗日闢五土反乎正色天
下號為重開控于南邦茲為北道總攬衆職更歷羣公
求民之瘼則多此川之阻未達豈漢陰抱甕恥用于機
心將漆水脫車未周于病涉承弊達變踵在今乎是標
輿地之圖書大事之策作鎮輿壤垂法永年俾神靈而
支持與天壤而相弊可矣侍禁陶侯思紀成績昭示方
來過聞畫餅之名俾記他山之石重迫制置文思之命
吏君都官之請溫教屢下亟讓弗皇作器能銘遠慚于

長筆表年首事始務于直書云天聖五年十一月十七日記

常州興化寺記

晉陵興教院東南距縣三十里圖志脫略了不究創剎之始按沙門從喜所撰石記寺本名南蘭會昌前寺已有之厥後例從詔毀至南唐保大中始復舊額易為禪院廢址僅在遺棟蕩然我之曾門夙植善本往以亂故泊無宦意治財以專施修稼以勤貸糾合鄉義捍固生

聚他盜引去茲境賴安一旦出橐中百金聚其族而謀
曰方今國步尚擾人道未夷幸而宗門得免亂世吾聞
西竺之教利生接物因權顯實使人崇十善持五戒去
貪離著尋本究原復一性之真常息萬塗之流競擺落
根境超出生滅此神道之極摯津梁之至妙無生上法
雖然成于解行有為勝業亦以董于種性盍興故刹以
勸同閑且為香火之集庶厭金革之難于是上下恭命
壯幼畢力即其故處敞為蘭若崇門我我高殿岌岌齋

房環合步廊周旋像設具嚴海會來續煥焉大壯號為
中興國初泛恩詔賜今額自偽唐保大丁未本朝乾興
後元甲子凡一周有奇矣年紀寔久咸安厥成風雨所
漂弗支其壞金碧漫滅棟梁摧頽有孫曰震于某為伯
父行善持門戶之業深惟堂構之言率籲諸宗議建大
殿裒合衆施凡得錢若干萬命寺僧自遷繼巒額尸其
役工未及僦而我伯父奄捐館舍子襄悼先志之不就
痛遺恩之罔極虔奉治命誓成夙願有同里湯見素者

思植善果樂預能事亦施五百萬錢協齊材瓦復命義
圓法源二僧關領其事天聖丁卯十二月新殿成觚稜
竦峙欄牙開張威鳳欲跂名翬將翔重轡眈眈睟容煌
煌左鐘右磬夜梵晨香裝嚴百福鎮茲一方妖子格跪
而前曰曾大以來家世樂善寺已絕而崛起殿將壓而
勃興宜著文辭有表後世復援孔悝銘鼎論譔先祖之
意辭之弗可因斐然直紀且以詒諸雲初云

潤州金壇縣清修亭記

縣邑之任有社稷民人之衆兼典刑政令之重春秋齋
祠尚于肅朝夕聽斷主于明大率神過用則疲形太勞
則殆鄙吝乘間而得入和粹有時而致虧君子防其然
也故官寺設宴息之所公日著休澣之令撥去几案依
于琴壺宴嘉賓友多聞陶冶情性發舒誠明節適語默
之宜均齊諠靜之觀夫然則神與境會心將道俱乃可
以彊有涯之生應一切之用以之事神治民則有成志
而無違心疵吝日銷純白來舍者也濮陽吳君中復端

粹而文為金壇長縣治三茅之左密邇勝秀精氣利澤
延施此郊山記所載句金之壇取是紀邑而縣寺湫底
承前弗治廳前數棟裁容受署至于委蛇退食之餘則
無他齋以息外物患其若此議未從出會民有輒伐叢
祠材竹者事發當籍之入官計踰百章足支一構因宜
乘利究奇選勝迺得西偏爽塏之地裁作崇址揭為新
亭繞帶清渠環映碧竹野色在望真想滿前榜之曰清
修亭君寶元初登科聞喜宴日上用故事賜第一人以

下御詩于時斷章有勛爾在清修之句因摘二字以名其亭且虔上化而服官政亭成不日書至言狀求記乃事欲詒諸後使知命名之自而識置亭之本不止專宴游資賞眺樂禽魚馴閒玩卉樹華滋而已靖恭爾位其有意于大雅者乎君以緒餘風力能舉其政字綏諸氓不翅已子勤恤此職有踰家事退則發舊書曩牘觀前言往行間命僚佐相與觴詠曹無留事訟源自閉引伸此道奚適而弗裕哉雖一亭一邑之細其規為思致所

存蓋遠矣

高齋記

南中江山類多託賞之美金陵故都緒餘六代華人夏
士盛棲此土雖一丘一壑之細皆經高賢名輩嘗所留
連茅許世外之風王謝江表之德山林臯壤號為名勝
子城東北趨鍾山為近南唐李氏嘗因城作臺臺上望
月人相呼為月臺下臨濬濠正面覆舟南對長干西望
冶城榛烟漁火泉華谷氣川禽山鳥翔嬉其間林木噓

陰之聲雲霞起滅之狀須臾眺聽萬態遞出此名勝之內特又名勝者也臺傾地荒介在人外一境之秀未有眇者康定辛巳之夏龍閣南陽公自三司拜符安輯江介政尚凝簡日多休暇寄意琴酒之適留好風泉之賞他日因行後圃遂登故城適廢臺留壞趾躊躇四眇愛歎形勝指言佳麗之觀此最妙處因哀材瓦之羨調兵幹之使塞蕪穢養華薄開逕自下立齋其上環植百柱通敞四軒高倅譙樓廣容宴豆檐宇飛竦勢將干雲旁

矚郊垌俯見廬井句曲之地肺華陽之洞墟三峯參差
彷彿在目雖進躁之士怵迫之人暫遊其藩一踐茲境
其心翛然猶以為已登崑崙涉閭風澹乎忘歸有超離
昏俗之意又況真粹之流平日隱几反照正性保御太
和人境相得其樂如何哉公既用鐘鼓落其成復須金
石記其始比辱來教見命記事曰我作是齋姑欲榜之
佳名而絕境雖摹了不可得今采謝宣城宴坐之意直
題曰高齋夫齋戒潔之稱休舍之所君子根本于道德

拯墊性命利用于安身有餘于治人不役志以營已常
虛心以待物其有為也精義致用以經世務之韞及其
無事也恬熙相養以濟天均之和故道用不勤而氣守
自若庖丁之奏刀老扁之斲輪顏生之坐忘伊公之強
德神機之王繇此物也公抱道混成栖神高映初總機
劇未嘗榮華比辭禁興亦忘欣戚方舍山水之所以穆
仁智之性高情遠尚焉可跂耶人之登是齋者當領會
公意不止邀樂壺觴取悅于林岫而已足使軋者忘其

名夸者辭其權長留清風以遺永年慶歷二年四月十九日記

題湖州西余山寧化寺弄雲亭記

西余山東出吳興城十八里初二山介溪兩傍俱名曰余土人以東西別其稱而西余特著單見于地志焉支水北引注于山下有廢寺十餘棟律徒不寧其宇景祐中沙門寶實聿來尸之崇治僧坊安集禪侶慶歷壬午予假守在雲客有詫茲山之勝者始欲一往仲冬乘雪

初霽晏溫少寒因與治中諸僚泊一二禪老刺舟而造
焉履莓苔捫蘿薦凡三休甫達于上方蔭長松坐盤石
躊躇四顧有翛然遐舉之想然猶恨登覽之差晦攀躋
之良勞有亟其還未盡所適他日再往則天風自戢水
波沸揚嚮之荆榛翦而為徑途昔之土石累而為磴道
安行百級遂至于高頂復又瞰山西面結宇十楹通清
遐閒曠之觀坐已實師前請曰山去湖十許里陵谷何
常之有庸詎知千百年後此山不在湖之中耶盍與之

名且志其事以遺來者使知創寺之始因以弄雲名其
亭亭之妙處予能言之卞山當其西如蒼龍蟠據勢欲
奮挺太湖在其北若元氣磅礴浩無津涯洞庭林屋綠
毛縹緲諸峯了了在目遠帆參差飛鳥凌亂溪雲往還
野艇出入百色映見如在鑑中此北眺之勝最也夫真
妄在心誼靜依觀上智之用不泥于物中人之習迺牽
于境吾知夫暫登茲山憩茲亭可以無誼無妄惟真惟
靜境與心俱冥神與氣俱生又況長栖巖阿而玩永年

者其真粹之樂可涯也哉慶歷癸未三月十八日記

常州晉陵縣開渠港記

常領四邑治吳西境晉陵戶二萬丁十萬過江來東列
為大縣其土會之法田第九賦第七帛宜絲枲穀宜秔
稻美川澤饒魚鰲太湖底定其南大江繞出其北間民
無事擅魚採之利以生其生有二浸之大而農不能引
以灌迹其所以民非棄之顧上謀之未及究旅力之不
能集爾天時稍或亢縮人心乘以焦窘慶歷辛巳高陽

許君恢以大理丞治于斯既視邑事審江湖之利可以
活夫田也迺歎曰昔西門豹治鄴漳水在鄴旁豹不能
用故史起譏之謂其不足以言智今茲邑南趣湖北倚
江據是美利田其舍諸委而弗謀大懼後世之嗤予也
因環按四封周咨野老迺得申港戚墅竈子三港皆往
時溉田之川所溉萬餘頃中間廢不復治緒餘且在因
倂圖言狀列于外計且曰湖水可以灌戚港江水可以
灌申竈計司移官覆視其利信然比得符文報從所請

始籲厥衆開陳以利民飴其言說以承使不戒而廩食具未幾而馨鼓興其集如雲迺畚迺鍤自二年冬十月濬申港凡三十八里引潮水抵城之西北隅朝夕再至焉竈子港去申港三十里自江口濬之凡四十里斜趣縣之東北不與申港合戚墅港東南去縣二十里自湖口濬之凡九十里太湖之舟楫至焉三港之溉申港為最博絲三大港之側聽民自射其便復引支水分注運瀆東函等十九小港以醴其利長波之所貫衆渠之所

殺變塋土成腴壤稽于大浸暢于四肢最凡計工二十
六萬前後凡三月而罷歲在鶡首秋夏仍旱他田不粒
港旁獨稔華黍疑疑清渠泱泱耒耨者賴焉網罟者依
焉爾牛爾羊來羣來思噫江湖以善利利萬物不私所
利至矣哉從于政者猶夫川也據能濟之勢操有為之
資胡利不可興曷害不可去棄而弗營者非力不足由
無志于民耳從是而觀高陽之政其惠之所字于民至
矣後之長此邑者當監前人之休卹百姓之欲嗣而浚

之繩而廣之使繼繼不絕則三港之利庸可竭乎慶歷四年正月二十八日記

流杯亭記

城邑之粹依于山川所以通氣象而宣底滯府寺之勝寄于亭沼所以棲神明而外氛濁許昌之右其水曰西湖自東北導潁水一支納于湖中淼漫奔淪浸可數里精氣利澤秋冬不涸蓋壁田所依之川也一名綠鴨陂唐薛能增廣其址作亭其上所謂綠鴨亭者名今在焉

大抵湖水脩于南北狹于東西芹蘋芡菱菰蒲菡萏之
植含葩聳幹或丹或白羅映洲沚粲若繪境秋鷺寒鴈
鼓浪往來晨鳧夕鴈乘煙上下翩翩去翼嗈嗈餘聲江
湖幽情滿于眺聽天王都汴許在案內殿藩之重率用
二府前弼及兩禁邇臣于以均執恪之勞就偃休之適
亦由湖水名勝可以濯煩襟而養妙氣也前後諸公構
亭環其上者甚夥釣臺射圃左右棲映隨所面勢咸極
佳趣其規摹宏大者有若湖中之堂曰清暑錢思公之

所作也橋跨一面樹環四際青蒼俯映潺湲可弄湖陰之亭曰會景呂文靖之所構也正據北岸臨瞰泉水禽魚卉木形無遁者會景之北有梅梨桃杏之園履中十畝中有堂曰淨居淨居之北有池曰迷魚清泉碧樹幽邃間靜有山間林下之思慶歷丙戌植直李公給事之治許也年獲豐茂日多暇豫間引參佐觴于湖上躊躇四顧超然獨得曰湖居之麗前人系作究奇選勝殆窮目巧然上已修禊勝集也念此獨闕渙水在側而弗知

用豈未之思耶乃立亭于迷魚之後西北置閣礮石作
渠析溪上流曲折凡二百步許彎環轉激注于亭中為
浮觴樂飲之所東西植雜果前後樹衆卉與清暑會景
參然互映為深遠無窮之景焉亭成榜之曰流杯落之
以鐘鼓車騎夙駕冠蓋大集賢侯莅止嘉賓就序朱鮪
登俎醑醕在樽流波不停來觴無算人具醉止莫不華
藻篇章間作足以續永和之韻矣復即湖之坤隅乘羨
水以作磴紆旅力之弊廣羣游之觀使漢陰老父見之

其必曰施于觴酌遊觀之美何其佳哉時友人梅聖俞
參畫郎幙且導府意託記亭事因念小雅鹿鳴之詩必
言燕樂者所以和人心而通政道也李公宣風阜俗怡
神樂職以餘力治亭榭以暇日飲賓友式宴以樂既惠
且和引而伸之河潤九里政之在物從可知焉又惟杭
潁二州西偏皆映帶流水同得西湖之號與許為三嘗
試評之杭挾武林天竺之秀而地偏東南潁占女台林
刹之佳而傳舍居其內許在三輔密邇神甸茅駟作鎮

輾嵩在西介于二京嘗遊七聖春秋重地尊先京師神明氣象湖水之勝應以陪京為首焉慶歷丁亥三月五日記

常州太平興國寺彌陀閣記

昔迦文于舍衛國宣說妙法稱讚四方之佛曰阿彌陀過十萬億刹居上品勝上其名曰極樂其壽曰無量以莊嚴為世界以慈悲為道場六時雨于異花八木涵于奇寶大光普照靈風回翔樹林之聲皆演真諦禽鳥之

慧悉談苦空含衆妙而巨量狀羣經而莫盡斯境也從
萬行而報彼國也無三惡之趣婆婆土穢衆生根雜放
逸不返苦惱無安有生老病死之悲有丘陵坑坎之汚
備造衆惡牽蹈諸趣夫境勝則欣跂情苦則疲厭故彌
陀如來深愍迷子為現淨土持四十八願拔濟羣品令
厭濁惡而欣妙嚴也雖大慈平等饒益一切而于閻浮
提之人機緣最熟雖復陵遲末劫具縛凡夫決能精誠
稱誦名號修三十六妙觀臨終之際真相締定乘大悲

之接引隨喜品而往生境界難思動念即至真實佛語
四衆具聞廣長舌相諸聖同表神者不疾而速豈謂是
哉及捨畏塗得依樂國普董妙行進登聖果安不退之
智地證無生之法忍還入三界營救羣迷同嚮菩提成
等正覺則知迦文之現穢彌陀之現淨調柔折伏同示
大權延促依正竝歸真智輔以觀音之慈悲勢至之寶
猛悲願參運象力總持幽贊咸通其應不一常州太平
興國寺蕭齊舊刹吳土名藍大江東流夙擅佳麗香海

右轉地稱吉祥大比丘可尊闡繹圓宗循持梵行神栖
安養之境志皈度脫之門開幕信根崇修淨業同結生
方之社以為即實之基上首信士傳廣門人子蘭與其
邑中之良夙殖善本勇結勝因樂聞言音歸趣信誓室
多忠信之舊戶興禪頌之風而又率籲檀那哀合財施
飭豫章之峻幹礱他山之密礎選良剖闕究奇塑範營
閣于本寺正殿之西偏造阿彌陀佛丈六金像居寶蓮
華之坐威德殊勝相好端嚴鐘梵落成金碧宣照緇素

和會幼艾咸集大治純陀之具廣施上妙之珍咸苦乃
心冀履其域有通淨名之說者相與歎言良匠之依空
地乃成宮室菩薩之取衆生以淨利土觀殖因于即世
知圓果于未來又若祖師何二之有茲閣也始事于慶
歷甲子成于戊子衆緣所集最凡計泉刀五百萬尊師
以宿早參道照託序緣興綴文匪工涉教殊淺寶嚴所
載聖妙難模雖殫無量之聲莫讚甚深之典矧輕毫燥
吻所能庶幾哉儻助宣流默祈回向至和丙申三月十

三日記

皇姪孫右監門率府率世護墓記

夫析天潢之源分玉葉之蔭承雲雨之渥施託日月之
末光生於其間貴莫之上噫既榮以地而嗇之年此造
物者不可得而致詰也右監門率府率世護左屯衛大
將軍秀州團練使榮國公從信之第五子曾祖吳懿王
大父惟忠彰化軍節度使舒國公母富陽郡君孫氏少
而聰悟過絕于人所好經書見輒能誦亦工篇詠頗有

思致良玉遽折靈芝早焚悲夫以皇祐二年六月八日
感疾夭闕年十二歲初藁殯于奉先之佛剎嘉祐庚子
十月乙酉改葬于河南之永安祔懿王之前域謹記



文恭集卷三十五